

**Qinersisartut Inatsisartunut kommunalbestyrelsinullu qinersinermi qinersivimmi
sumiiffimmi sumiikkaluartumiluunniit qinersisinnaangornissaat anguniarlugu
suliaqaqqullugit Naalakkersuisut peqquneqarnissaannik Inatsisartut
aalajangiiffigisassaattut siunnersuut**
Siumumit saqqummiunneqartoq

pillugu

Inatsisinut Ataatsimiititaliap

siunnersuutip aappassaaneerneqarneranut

ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Aqqalu C. Jerimiassen, Atassut, siulittaasoq
Inatsisartunut ilaasortaq Kuno Fencker, Naleraq, siulittaasup tullia
Inatsisartunut ilaasortaq Pipaluk Olsen, Demokraatit
Inatsisartunut ilaasortaq Iddimanngiiu Jensen Bianco, Inuit Ataqatigiit
Inatsisartunut ilaasortaq Anders Olsen, Siumut

UKA2025-mi ulloq 7. oktober 2025-mi siullermeerinninnerup kingorna ataatsimiititaliap
siunnersuut misissorpaa.

Siunnersuutip imarisaa siunertaalu

Qinersisartut Inatsisartunut kommunalbestyrelsinullu qinersinernut atatillugu
ajornannginnerusumik qinersisinnaalernissaat siunnersuummi siunertarineqarpoq.

Siunnersuut akuerineqassappat qinersisartup qinersivimmi sumiiffimmi
sumiikkaluartumiluunniit qinersisinnaangornissaa sulissutigeqqullugu Naalakkersuisut
peqquneqassapput. Tamanna ilaatigut Inatsisartunut qinersisarneq pillugu Inatsisartut
inatsisaanni aammalu kommunalbestyrelsinut, nunaqarfinni aqutsisunut ilagiillu sinniisaannut
qinersisarnerit pillugit Inatsisartut inatsisaanni inatsisit atuuttut allanngortinneqarnerannik
nassataqassaaq.

Siunnersuutip Inatsisartunit siullermeerneqarnera

Siunnersuut siullermeerneqarmat siunnersuut partiinit Naalakkersuisunillu tapersorsorluarneqarpoq. Taamaakkaluartoq qinersisarnerup aaqqissuussaanerata qinersinissamullu periarfissat allanngortiterujussuarnissaat pisariaqartinneqarnerasoq annertuumik oqallisigineqarpoq.

Naleraq allannguutissatut siunnersuummik imaattumik saqqummiussivoq:

”Qinersisartut Inatsisartunut kommunalbestyrelsinullu qinersinermi qinersivimmi sumiikkaluartumiluunniit qinersisinnaannagnornissaat anguniarlugu suliaqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.”

Tamatuma kingorna siunnersuut ataatsimiititaliamut suliarineqartussanngorlugu innersuunneqarpoq.

Siunnersuutip aningaasaqarnikkut kingunerisassai

Aalajangiiffigisassatut siunnersuutit piviusunngortinneqarneranni aningaasaqarnikkut allaffissornikkullu kingunerisassat siunnersuutip tunngavilersuutitaani nassuiaatigineqartassasut Inatsisartut suleriaasianni § 33, imm. 1-imi allassimavoq.

Ataatsimiititaliamit maluginiarneqarpoq siunnersuuteqartup aningaasatigut kingunerisassanik allaaserinninnera malillugu aningaasaqarnikkut kingunerisassanut apeqqutaavoq siunnersuut qanoq piviusunngortinneqassanersoq.

Taamatuttaaq siunnersuut qarasaasiaq atorlugu qinerseriaaseqalernissap sulissutigineqalerneranik nassataqassappat siunnersuut annertuumik aningaasartuuteqarfiussasoq Naalakkersuisunit oqaatigineqarmat ataatsimiititaliamit maluginiarneqarpoq. Tassunga ineriartortitsinermut, ingerlatsinermut isumannaallisaanermullu pissutsit ilanngullugit eqqarsaatigalugit.

Kiisalu siunnersuutip piviusunngortinneqarnerani inatsisit attuumassuteqartut allanngortinneqarnerisigut inatsisinik piareersaanermut atatillugu allaffissornikkut aningaasaqarnikkullu aningaasartuuteqartoqarnissaa naatsorsuutigineqartariaqartoq ataatsimiititaliamit oqaatigineqassaaq.

Taamaattumik tunngavissat pigineqartut tunngavigalugit aningaasaqarnikkut allaffissornikkullu kingunerisassat tamarmiusut sorliit siunnersuutip piviusunngortinneqarnerata nassatarissanerai ersernerluttoq ataatsimiititaliaq isumaqarpoq.

Ataatsimiititaliap siunnersuummut oqaaseqaatai

Siunnersuut siullermeerneqarmat Inatsisartuni partiinit Naalakkersuisunillu tapersersorluarneqartoq ataatsimiititaliamit maluginiarneqarpoq. Qinerseriaasitta ineriartortinneqarnissaanik ataatsimut isigalugu kissaateqartoqarnera tamatuma ersersippaa.

Tamat oqartussaaqataaneranni tunngaviit, teknikikkut isumannaallisaanikkullu isiginiagassat ataqqineqarnerannut peqatigitillugu siunissami aaqqiissutigineqartup innuttaasunut eqaatsuunissaata qulakkeerneqarnissaa ataatsimiititaliamit pingaartinneqarpoq.

Kiisalu siunnersuutip piviusunngortinneqarnissaanut aaqqiissutissaq toqqarneqartoq siunnersuutip piviusunngortinneqarnerani aningaasaqarnikkut allaffissornikkullu kingunerisassanut tamarmiusunut apeqqutaalluinnartoq ataatsimiititaliamit oqaatigineqassaaq.

Ataatsimiititaliap inassuteqaatai

- Ataatsimiititaliami amerlanerussuteqartut Demokraatineersut, Inuit Ataqatigiinneersut, Siumumeersut Atassummeersullu siunnersuutip akuerineqarnissaa inassutigaat allannguutissatullu siunnersuutip itigartinneqarnissaa inassutigalugu.

Ataatsimiititaliap taama oqaaseqaateqarluni isumaliutissiisummilu allassimasutut paasinnil-
luni siunnersuut aappassaaniigassanngortippaa.

Aqqalu C. Jerimiassen
Siulittaasoq

Kuno Fencker
Siulittaasup tullia

Pipaluk Olsen

Iddimanngiiu Bianco

Anders Olsen